

Aningaasaqarnikkut ingerlatsineq pillugu Nalunaarut

Saqqummiussinermut allakkiaq

(Aningaasaqarnermut Naalakkersuisoq)

Siullermeerneqarnera

Ussatitoqqat ilaat ima oqaasertaqarpoq: "Angalanerit sivisuut alloriaqqaarnermik aallartinneqartarput".

Ussatit oqaasertaat taakku Naalakkersuisut nunatsinnut atatillugu aallartinniagaannut assersuutissaalluarput. Angalaneq maanna aallartittussaq 2025-llu tungaanut ingerlanneqartussaq aammalu nunanitsinni oqimaaqatigiissaartumik allannguinermik kinguneqartussaq. Angalanerup tamatuma kingunerissavaa nunatsinni assigiinngissuseq annikillisissagatsigu, soorluttaaq meerartatta, taakku angajoqqaavisa aataakkuisalu atugarissaarlutik inuuneqarnissaannut sulii akissaqarnissarput qulakkiissagaa.

Ullormit ullormut politiki atorlugu unammilligassagut aaqqiissuteqarfignannaangilagut

Ullormit ullormut politiki tunngavigalugu aalajangiisarnikkut unammilligassagut aaqqiiviginnaangilagut. Aamma suliaasaqarfinni ataasiakkaani anguniakkat iluarsiivigineqaannartarnerat naammanngilaq. Suliniutit tamarmik immikkut inuiaqatigiinnik imminnut napatittunik naligiissaarnerusunillu qulakkeerisut imminnut ataqatigiittut arlalippassuit pisariaqartinneqarput.

Tamanna anguneqassaaq inuiaqatigiinni sanngiinnerit inuuniarnikkut atugaasa suliniuteqarfignersigut, tamatuma peqatigisaanik pingaartumik meeqqat atuarfianni ilinniartitaanikkut suliniutip nukittorsarneratigut aammali sulisinnaasut arlaatigut peqquteqartumik piginnaangorsaataasumik ilinniagaqarsimanngitsut nukittorsarnerisigut.

Akilerartarnermi, ineqarnermi, isumaginninnermi pensionisiaqartitsinermilu anguniagassatigut iluarsartuussinerit arlalippassuit aamma ingerlatissavagut, tamatumalu peqatigisaanik inuussutissarsiutini nutaani namminersortunit ingerlanneqartuni aningaasaqarnikkut tunngavissanik aalajaatsumik inerikkiartorfiusunik pilersitsissalluta.

Taamatut suliniuteqarnitsigut inuiaqatigiinni assigiinngissuseqarnera annikillisissinnaavarput. Tamanna 2025-mi meerartatsinnut, taakku angajoqqaavinut aatakuinullu atugarissaarnermik pitsaasumik pilersitsinissamut pisariaqarpoq.

Assigiinngissuseq annikillisarniarlugu inuiaqatigiillu atugarissaartut qulakkeerniarlugit maanna suliniuteqarpugut

Assigiinngissuseq annikillisarniarlugu inuiaqatigiillu atugarissaartut qulakkeerniarlugit suliaasaqarfippassuarni assigiinngitsuni sulianik aallartitsererpugut.

Meeqqanut inuusuttunullu politikip nutaap atuutsinneqalernissaa sulissutigaaarpugut, taanna aqqutigalugu kommunit suleqatigalugit meeqqat, inuusuttut taakkulu ilaqutaasa piginnaasaqarluartunit sullinneqarnissaat anguniarlugu.

Meeqqat amerlanerit ilinniartitaanikkut toqqaannartumik ingerlaqqissinnaangorlutik piginnaasaliissutaasumik misilitsittarnissaat qulakkeerniarlugu meeqqat atuarfiat nukittorsarlugu sulissutigaarput.

Ilinniartit ilinniartullu ineqarfiisa annertusarneqarnissaannut aningaasaliivugut, taamaaliornikkut inuit amerlanerusut piginnaangorsataasumik ilinniagaqalernissaannik anguniagarput taperserniarlugu.

Suliffissaaleqisunut suliniutit immikkut ittut aallartippagut.

Illoqarfinni initaarnissamut utaqqisut amerlanerpaaffigisaanni inissiarpassuarnut aningaasaliivugut sanaartorlutalu.

Ilaatigut peqqinnissaqarfimmi suliaritinnissamik utaqqisut ikilisarniarlugit amerlanerusunik aningaasaliissuteqartuarpugut.

Aalisarnermik iluarsartuussinermi immikkoortoq siulleq naammassivarput, taamaaliornikkut aalisarnermik inuussutissarsiteqarneq isumannaatsoq tapiiffigineqarnissamik pisariaqartitsinngitsoq qulakkeerniarlugu.

Aatsitassarsiornermi politiki qanittukkut qinikkanit isumaqatigilluarneqartoq attatiinnarparput, tamatumani isumaqatigineqarluni aningaasaqarnikkut inerikkiartornissaq taamaalilluni nunatsinni atugarissaarnerup annertusarneqarnissaa qulakkiissagutsigu aatsitassarsiornermi atugassarititigut tunngavissat aalajaatsut tutsuiginartullu pisariaqarmata.

Suliniutit taakku tamarmik assigiinngissutsip annikillisarneqarnissaa aammalu inuiaqatigiit atugarissaartut attatiinnarnissaa qulakkeerneqarnissaallu siunertarlugu ingerlanneqarput. Aningaasaqarnermik ingerlatsinermik akisussaassuseqartumik tunngaveqarluni tamanna ingerlanneqarpoq. Aningaasaqarnermik ingerlatsineq akisussaassuseqarfiuvoq aningaasaqarnitsinni oqimaqatigiissaarinerup atuuteqqilernerata iluatsinneranik kinguneqartoq.

Piginnaaneqarnerit nammataqarnerussapput piginnaanikinnerillu piginnaangorsarneqassapput

Kalaallit Nunaat 2025-mut atatillugu qimerluukkatsinni qitiusut ilagaat akileraartarnermi, ineqarnermi, isumaginninnermi pensionisiaqartitsinermilu anguniagassatigut iluarsartuussinerit arlalillit aqutigalugit assigiinngissutsip annikillisarneqarnissaa. Taakku annertoorujussuussapput aammalu tunngaviumik isigalugu piginnaaneqarnerit nammanneqassallutik.

Ullumikkut isertitaqarfiit amerlasuut akileraarusersorneqanngitsut akileraarusersorneqartulluunniit annertuumik mianersorfiususaapput. Tamatuma peqatigisaanik pingaartumik ineqarnermut politikimi tapiissuteqartarnermut aqqissuussinerit arlalippassuit ima inissitigaapput inuit taama tapiiffigineqarnissaminnut pisariaqartitsinngitsut tapiiffigineqartarlutik. Tamanna allanngortissavarput. Akileraartarnermut politiki nutaamik aaqqissuunneqassaaq, taamaalilluni ilaatigut sulinani isertitat akileraarusersorneqarnissaat qulakkeerneqarluni. Aamma ineqarnermut politikki nutaamik aaqqissuunneqassaaq, taamaalilluni ineqarnermut tapersiissutit pisariaqartitsivissunut atuutsinneqalersillugit.

Piginnaaneqarnerilli kisimik annertunerumik nammakkeerneqarnissaat naammanngilaq. Assigiinngissuseq annikillisissagutsigu aammalu inuiaqatigiit atugarissaartut qulakkiissagutsigit piginnaanikinnerusut piginnaangorsarnissaat aamma pingaaruteqarpoq. Innuttaaqatigut ikiorserneqarnissaminnik pisariaqartitsisut uagut inuiaqatigiittut inooqataasutut suli aamma ikiussavagut. Taamaatorli tapiiffigineqaraanni imminut pilersorsinnaanissaq anguniarneqassaaq. Allatut oqaatigalugu pilertortumik ikiorneqarnissamik pisariaqartitsisut ikiorserneqarnissaat qulakkiissavarput, tamatumali

peqatigisaanik imminut pilersornerulernissamut sakkussaqaalernissaat kajumissuseqaalernissaallu isumagissallutigu. Isumaginninnermi politikip nutaamik aaqqissuunneqarnissaa aammalu ilinniartitaanikkut suliaqartut suliffissarsiuussisullu qanimut suleqatiginissaat pisariaqarpoq.

Kiisalu pensionisianut tunngasut iluarsartuuteqqissavagut, taakku ilaatigut aqutugalugit qulakkeerneqassalluni inuiaqatigiinni utoqqaat aningaasassaqaartinneqassalluni aammalu uagut ukioqqortusiartuinnarnerput eqqumaffigissallugu. Tamatuma ilaatigut kinguneraa uagut innuttaasutut utoqqalinissatsinnut nammineq ileqqaaruteqaalernissatta isumagineratigut nammineq akisussaaffeqaassagatta. Tamanna sulisartut amerlanerpaartaannut qujanartumik ullumikkut atuuppoq. Taamaattorli inuiaqatigiit ilaqarput suli taama inissisimangitsunik.

Suliffeqarnermi illuatungerisat pingasoqiusamik oqaloqatigineqarnerat

Iluarsartuussinerit pisariaqartut ullormit ullormut ingerlanneqarsinnaanngillat. Iluarsartuussinerit pilersaarusiorneqassapput sukumiisumillu oqallisigineqassallutik, Inatsisartuni aammalu innuttaasuni. Taamaattumik iluarsartuussinerit tamakku oqaluuserineqarnissaanut illuatungerisat Naalakkersuisunit aggersarneqarput.

Suliassaq siulleq suliffeqarnermi illuatungerisanik oqaloqatigiissutigisarput tassaavoq akileraarutit inuuniarnikkut atugarisanut naleqqussarneqarnissaannut periarfissaq. Tamatuma kingunerissavaa innuttaasut suliffillik akileraarutit ilanngaatigereernerisigut isertittagaasa annertuseriarnerat. Suliffeqarnermi illuatungerisat peqatigalugit maanna nalilersorparput sulinermut akileraarutit 2013-imit appartinneqareersinnaanersut. Tamatumani pisariaqartoq tassaavoq allannguinermik aningaasalersuisinnaanissarput aammalu tamanna inuuniarnikkut atukkanik oqimaaqatigiissaarineq tunngavigalugu pisinnaassasoq.

Taamaattorli akileraarutit aaqqissuuteqqinnerat naammanngilaq. Isumaginninnermi iluarsartuusseqqinnerit ilinniartitaanikkullu suliniutit peqatigalugit inuit ullumikkut suliffissaaleqisut ataavartumik suliffeqaalernissamut kajumissarnerisigut assigiinngissutsip annikillisarneqarnissaanut tapeeqataassaaq. Aatsitassarsiorfiit nutaat piviusunngorpata suliffissat amerlanerpaat nammineq isumaginissaannut piareersimassaagut.

Aatsitassarsiorfiilli nutaat piviusunngornissaat utaqqiinnarsinnaanngilarput. Ullumikkut iliuuseqareernissatsinnut tamatta akisussaaffeqarpugut, ullumikkut suliffissaaleqinerup annertusiartuinnarfiani. Taamaattumik kommunit suleqatigalugit suliffissaaleqisunut immikkut ittumik suliniut aallarereerparput.

Suliffissaaleqisut amerliartuinnaraluartut aamma oqaatigineqartariaqarpoq suliffissat ikiliartunngimmata. Suliffissaqarpoq. Taakkuli tikisitanit inuttalerneqartariaqartarput. Ilaatigut aamma ilinniarsimangitsunik atorfinitsisoqartariaqartarluni. Tamanna ajornartorsiutaavoq suliffeqarnermi illuatungiliuttut kommunillu suleqatigalugit aaqqinniagassarput.

Tamanna siunissamut ungasinnerusumut pilersaarutitut tapersiutaassaaq, tamatumani inuusuttortatta amerlanerpaartaasa naleqquttumik ilinniagaqarnissaat qulakkeerniassallutigu. Tamanna nunatsinni assigiinngissutsip annikillisarneqarnissaanut annertuumik pingaaruteqarpoq, soorluttaaq meerartatta, taakku angajoqqaavisa aataakkuisalu atugarissaarlutik inuuneqarnissaannut suli akissaqarnissarput qulakkiissagaa.

Taamatut oqaaseqarlunga Inatsisartut oqallilluarnissaannik kissaappakka, tamatumani aallunneqassalluni siunissaq aammalu Kalaallit Nunaat qanoq ililluta imminut napatinnerulersinnaaneripput